



Aqqalu C. Jerimiassen

UKA 2025/50-1

Atassut

08. Oktober 2025

Pinerluttup aallaavigineqarneranut taarsiullugu siunissami pinerluutigisap aallaavigineqartalernissaa pillugu Kalaallit Nunaanni pinerluttulerinermik inatsisip allanngortinneqarnissaa siunertaralugu Naalakkersuisut Naalagaaffeqatigiinni oqartussaasunut atassuteqarnissamut peqquneqarnissaannik Inatsisartut aalajangiiffigisassaattut siunnersuut

(Inatsisartunut ilaasortaq Bo Martinsen, Demokraatit)

Pineqaatissiisarneq sakkukippallaaqaaq!

Pillaasarneq eqquttariaqarparput, inuartoq peqqarniittumik pissutissaqarani iliuuseqartoq nallinnartuunngilaq.

Meerannguanik arlariinnik kinguaassiutitigut kanngutsaatsuliortoq nallinnartuunngilaq.

Inuk inoqatiminut sussuteqanngitsunut nakuusertartoq nallinnartuunngilaq.

Kinguarsarunnaarniarta tamakkununga sakkortunerusumik iliuuseqarnissatsinnut, inoqammut ajortuliortoq taannaasariaqarpoq kinguneqartitsivigineqartoq, eqqungaasut tunulliuuneqartuaannarsinnaanngillat ajortuliortoq sutigut tamatigut sallinngormiaannaavillugu.

Oqartoqartuaannarsinnaanngilarmi; una taamak pinerluuteqartoq imannaguna nalaataqartinneqarsimagami taamannak meeqqamut iliortoq. Iliuuserisaq inummiippoq, innarliineq pereerpoq, sorraatsoq inersimasorsuaq meeqqamut minguinneerpaamut sequmeereerpoq.

Ataguli maanna uani oqallinnermi ataatsimoorfeqarta, siunnersuuteqartup anguniagaa paasinarluinnarpoq apeqqusertariaqaraniluunniit.

Tassami pinerluttoq A iliuuseqartoq ippassaaniummat pikkorissunnguulluni peqatigiiffilerinermi angusarisaarsimappat, kisiannilu unnukkuani peqqarniittumik inuarsimalluni, sorleq tassani oqimaalutaq atorneqassanersoq ilimanartareerpoq, taannaassoorlu sivikillisakkamik maligassiuisarmat pineqaatissinneqartoq.

Taava maanna pinerluttoq B iliuuseqarpoq pinerluttoq A assigilluinnarlugu, unali pinerluttoq B atisarluttuuvoq atungarissaartoorpasigani, atuisuuninilu ilisimaneqaatigivaa. Ajutumeerniarneqarnermini inuunerminut ulorianarsinnaasmik imersimatilluni imminut illersorniarluni toquttoopaa, pinerluttoq A-tut pineqanngilaq ulluinnarni inuunera allaanerummat "takussunarnerusutut" isikkoqarmat.

Inoqammut Indiami kaste-lersuilluni naqissusiisarneq ajoraluartumik tassani inuttaa aallaavigalugu pineqaatissiisarnermik inatsiseqarnitsinni atuutsipparput, aappaa naleqarnerusutut aappaalu naleqannginnerusutut pillugu, allaanngiivilluni atuakkami Kammerat Napoleon-imi oqaaseq atorneqartoq: "uumasut tamarmik nalingiipput, ilaalli nalingiinnerupput".



Takussutissaq erseqqissoq, maanna pineqaatissiisarnermut periuseq atungarput ullutsinnut tulluanngilluinnartoq.

Atagumi nittartakkakkut kikkut tamarmik naapeqatigiittarfiini oqaatsit atorneqartartut qiviaannariartigit, assersuutissaqqittut ilagaat, tusagassiuutit nunatsinni piusut nittartakkaminni saqqummiussa at ikkunneqaraangata pinerluttuliorsimasut pineqaatissinneqarnerinut tunngassuteqartunik, inuit ikigisassaanngivissut naammagisimaarinninngilluinnarlutik pineqaatissiissummut qisuariartarnerat.

Aali uppersaataatissaqqissut ilaannaattut taaneqarsinnaasoq.

Taamaammat suliaq una naalakkersuisut aallartisariigaanut siornatigut eqqartoriikkatsinnut aappassaaneerneqartussamut assut tapukkusunnarpoq.

Taamaattumillu Atassummiit, siunnersuummut soqutiginnilluarluta Naalakkersuisut allannguutissatut siunnersuutaat taperserlutigu Inatsisinut ataatsimiitsitaliamut innersuupparput.